



明清文獻叢刊

陳子龍 著
王英志 輯校

陳子龍
全集

下



陳子龍全集

中



陳子龍 著

王英志 輯校

人民文學出版社

圖書在版編目(CIP)數據

陳子龍全集/(明)陳子龍著;王英志編纂校點.

—北京:人民文學出版社,2010

(明清別集叢刊)

ISBN 978-7-02-006843-2

I. ①陳… II. ①陳…②王… III. ①古典文學-作品集-中國-明代 IV. ①I214.82

中國版本圖書館 CIP 數據核字(2010)第 164135 號

責任編輯:周絢隆 杜維沫

責任印製:史 帥

人 民 文 學 出 版 社 出 版

<http://www.rw-cn.com>

北京市朝內大街 166 號 郵編:100705

北京天來印務有限公司印刷 新華書店經銷

字數 1300 千字 開本 880×1230 毫米 1/32 印張 54.625 插頁 9

2011 年 6 月北京第 1 版

2011 年 6 月第 1 次印刷

印數 1—3000

ISBN 978-7-02-006843-2 定價 210.00 元

如有印裝質量問題,請與本社圖書銷售中心調換。電話:01065233595

總目録

前言 一

編校說明 一

陳忠裕公全集 一

安雅堂稿 一〇二三

論史 一四二九

兵垣奏議 一四七七

《詩》問略	一五五一
-------	------

詩詞曲文補輯	一五七五
--------	------

附錄	一六二七
----	------

陳忠裕公全集卷十八

五言排律

《幾社稿》

春寒大風雨竟日分詠水讓居

負濕資佳興，天風動碧洲。野雲紛亂甚，潭影澹茫收。聲雜情難定，寒深春不流。柳沈狂綠泛，花損瘦紅愁。小寺鐘搖暮，孤村樹學秋。展蕉思卷障，夾柏代張油。蓑色聯青草，漁絲起白鷗。蝸生盤廢院，鶯夢結重樓。雨外啼雞重，烟中宿鳥浮。繡畦奔峽澗，幽渚恍蛟虬。病對魂尤斂，詩成客進酬〔一〕。人今無好事，勒卣畏雨不至。景勿厭常遊。壓霧矜清夜，空雷偈暗丘。籃輿忽踵至，稍愧鄭莊郵。予復以輿載，勒卣遂至也。

【校】

〔一〕「酬」，原本《幾社稿》作「愁」。

爲杜徠西悼亡 【考證】《復杜姓氏錄》：「青浦縣杜駿徵，字徠西。」

本是巫峯秀〔一〕，移來茂苑鮮。擷芳杜有若，求種楚爲先。劉女門仍大，衛娘家更賢。小樓憐碧玉，曉匣棄青鉛。理鬢秋蟬見，飄裾春燕穿。桃花嬌暮雨，蘭葉破朝烟。龍腦燒鸞帶，龜珠飾雁鉤。紅紋綃羅織，綠水軫初旋〔二〕。繡幃金爲翦，枯桐荻化絃。珊瑚扶鼠筆，蛤粉拭魚箋。硯愛琉璃疊，文多玳瑁編。書名傳弟子，簫譜動神仙。紗繫輕持臂，鉤藏屬放拳。素娥雲作扇，青雀羽成船。礬石溫香露，琅玕刺寶軒。佳人方鳳舞，公子正鸞肩。蜎肉膳脂樣，蟾肪瓊瑤邊。犀釘涼不捲，熊席暖餘妍。白髓資朝染，黃臍減夜煎。歡情三卅月，愁緒九秋天。急雨催銀箭，狂瀾蕩石蓮。飛花傷要渺，落葉病嬋娟。紅壁釭搖滅〔三〕，丹幡輦召還。玉妃呼月御，婺女失星躔。閨苑悲離鶴，人間泣杜鵑。返魂香自賁，懷夢草空眠。竊藥先奔羿，凌波不姓甄。抱寒吟桂殿，流眄坐芝田。荳蔻心猶白，悉茗莖竟玄。空餘龍縞襪，何用比肩氈？不見雲爲雨，常看水逝川。劉郎悲毒石，穆滿弔寒泉。銀鴨衣猶熱，金蟲髮尚纏。韓馮飛惻惻，秦吉語僂僂。魂斷燈初淚，神傷月再圓。自多新宛轉，無復舊因緣。熊膽口中苦，馬蹄雲外牽。莎青神女冢，頭白小姑篇。寄子九節草，貽郎七寶鞭。相期同不死，惆悵白雲年。

【校】

〔一〕「是」，原本《幾杜稿》作「自」。

〔二〕「綠」，原本《幾杜稿》作「淥」。

〔三〕「釭」，原本《幾杜稿》作「缸」。

《陣李倡和集》

獻山東俘志感 誅叛將，故毛帥子也。

海宇仍清晏，孤恩自不祥。大凌圍北騎，小隊援東方。露刃廣川道，焚燒漯水旁。回師朝拔幟，作賊夜排牆。刑馬爲兄弟，椎牛號帝王。單求留後節，都刻總戎章。築塹攻萊子，分兵掠過鄉。旌旗多繡虎，官吏半屠羊。設款臣謀誤，窮誅帝業昌。勢成熊搏子，計就鼠歸囊。發弩城如蝟，窺營臂似螳。裸裎逐少女，笑傲盡餘觴。睥睨排螭首，盤餐用馬腸。脯肝原跖食，腊骨載權糧。豺虎今圍檻，鯨鯢似渺茫。三方柵蔡濟，一面走盧芳。連引田橫孽，鉤牽趙信亡。但耽□作窟，不見溟無梁。鴨綠河仍碧，鹿黃山正蒼。度遼搜島嶼，橫海駕餘艘。王滿終亡國，公孫不啓疆。矧將天射血，安得海栽桑！虎士擒生易，熊渠遞驛忙。東師射雕將，北闕爽鳩郎。告廟崇軍禮，臨軒肅武裝。頭行萬里塞，膽掛五都坊。帝力何年大？皇綱此日張。餘威空赤幘，猛勢震青羌。內鈔鴉翎黑，南金菊葉黃。孤兒官累若，毅魄廟高涼。銀榜靈雲照，銅符義澤皇。諸生皆奮魯，父老解歌唐。八寓同風動，中垣列宿行。初成夷小醜，終擬截要荒。憶昔營滄海，皆疑據樂浪。漏師豎子橫，矯詔督師狂。幾泣華亭鶴，還生洛下狼。鷹鷂如戰伏，虎翼更飛揚。不遇人謀素，寧知天道長？英雄時灑淚，都欲奏明光。

【考證】《明史·朱大典傳》：「崇禎五年四月，李九成、孔有德圍萊州，大典督主客兵數萬，及關外勁旅四千八百餘人，合勦之。以總兵金國奇將，率副將靳國臣等至昌邑，分三路：國奇等關外兵爲前鋒，鄧圻步兵繼之，從中路灰

埠進昌平。總兵陳洪範、副將劉澤清、方登化從南路平度進。參將王之富、王文緯等從北路海廟進。檄遊擊徐元亨等率萊陽師來會，以牟文綬守新河，諸軍皆抵新河東岸，亂流以濟。祖寬至沙河，有德迎戰大敗，諸軍乘勝追至城下，賊夜半東遁，圍始解。竄歸登州，國臣等築長圍守之。十一月，九成搏戰，官軍合擊之，賊于陣。賊渠魁五，九成、有德、有時、耿仲明、毛承祿也。及是殺其二。六年二月，有德先遁出海，仲明以水城委副將王秉忠，己亦以單舸遁。官軍遂入大城，攻水城，城崩，官軍入。賊退保蓬萊閣，大典招降，始釋甲，俘千餘人，獲棄忠及僞將七十五人。有德等走旅順，島帥黃龍邀擊，生禽其黨毛承祿、陳光福、蘇有功，斬李應元。惟有德、仲明逸去，乃獻承祿等于朝，磔之。」

《屬玉堂集》

天津

【考證】《畿輔通志》：「天津屬小直沽。明永樂二年，始立衛。本朝雍正三年，改爲州；九年，改設天津府。」又：「天津地當九河津要，路通七省舟車。」

渤嶼孤關重，神京左輔長。地維趨浩蕩，天漢隔蒼茫。淮舶霾朝霧，遼橋帶夕陽。建牙環北極，轉餉出東方。二水爭流急，孤城戍火涼。魚鹽河市白，星月島營黃。自失三韓固，重添九塞防。將軍虛騷裏，□□擬舟航。駕海初無僕，降□近有芳。絳幢新制府，赤羽舊戎行。蒼兕威珠闕，玄狐奉錄章。樂浪終人漢，平壤更歸唐。帝敕樓船重，兵連屬國強。何時度遼將？飛捷奏明光。

【考證】《明史·河渠志》：「成祖肇建北京，轉漕東南，由山東達天津，曰北河。由天津達張家灣，曰通濟河。而總名曰漕河。」又《莊烈帝本紀》：「六年五月壬子，孔有德及其黨耿仲明等，航海降于我大清。」

寄贈密之

故人迴首地，三載愧容光。日月還輝照，風雲正渺茫。許身空自大，抱膝意難忘。樂毅干燕主，終軍獻武皇。長纓今不用，駿骨古誰藏？國廩多麒麟，天地滿鳳凰。叩牛還俊傑，牧豕更賢良！督亢生春草，滹沱散夜檣。京華搖落遠，關塞別離長。河決魚龍鬱，江清鶴鶴翔。夢慚紅綿段，佩摘紫羅囊。春後荒荒病，歸來渺渺傷。寄書懷薊北，知汝臥樅陽。筆勢新來橫，星官近可詳。元瑜爲記室，敬禮擅文章。海內芙蓉府，家聲符璽郎。新遊應并翼，舊客半荆揚。狎主詩名重，抒謀武略彰。蜀山搜寇盜，楚峽上豺狼。白帝天邊固，青巾隴外張。江陵愁竟下，皖口料嚴防。何計干戈戢？長江一葦航。

楊伯祥太史奉使冊封蜀藩，予遇之吳中，作詩贈行兼述舊懷也 【考證】《明史·地理

志》：「四川成都府，成都縣倚，洪武十一年建蜀王府。」又《諸王傳》：「蜀獻王椿，太祖第十一子，洪武十一年封，二十三年就藩成都。性孝友慈祥，博綜典籍，容止都雅，帝常呼爲蜀秀才。時諸王皆備邊，練士卒，椿獨以禮教守西陲。川中二百年，不被兵革，椿力也。萬曆四十三年，至澍嗣，崇禎末，京師陷，蜀尚無恙。未幾張獻忠陷成都，至澍率妃妾投於井。」

帝圖分白社，漢節抵吳天。劍佩辭華蓋，風雲接錦川。桐圭虞叔重，珍玉魯侯專。宗望誰爲首？文

昭向比肩。西南迴地紀，井鬼直星躔。益部稱雄鎮，華陽有舊編。昔聞高帝子，獨數獻王賢。禮樂存餘器，經書更幾傳！至今朱邸貴，猶擅綠池妍。玉輅頒王命，金閨輟講筵。乘傳來北極，捧檄喻西偏。上苑推司馬，靈祠頌子淵。到吳秋渺渺，入楚月娟娟。九派魚龍宅，三湘橘柚邊。猿啼星漢影，鳥道薜蘿烟。自解江臯佩，還成《巫雨》篇。雲深神女廟，風勁屈平田。虛壁秋容壯，空山象緯縣。丁香花杳冥，么鳳羽翩跹。絕岸巴歌冷，平沙石陣圓。波濤恆隱馬，瘴癘欲跼鵝。丞相祠堂在，公孫伯業捐。旌旗隨羽扇，巫覡醉神絃。今日夔天險，還同漢幅隕。使星驚李邵，織女犯張騫。飛蓋循芳草，鳴騶擁曲旃。初辭灌口馬，復入錦江船。負弩平郊盛，張筵法饌煎。諸侯間國禮，父老聽王宣。枸醬傳殊品，嘉魚出異鮮。子侯貽麗錦，官伎乞名箋。卓女今誰豔？揚雄可尚玄？兼稱採訪使，莫作浪游還。劍外豺狼滿，川東羽檄纏。庸知無李特，妄意學劉焉。宰相迴翔處，英雄割據權。弗令形勝地，常在甲兵前。我已歌吳市，君方備漢員。耽文分甲帳，努力事丁年。萬里橋邊暮，相思託杜鵑。

傷秋 五首

黯淡江南日，繁憂更幾端？秋風龍劍動，明月虎旗殘。朔氣危乘障，兵符擬築壇。漁陽突騎遠，時藋督西援。上谷解圍難。漢闕鉤陳正，秦關太白寒。更聞河外警，都護救樓蘭。

聞道西征使，三關擁大荒。胡沙猶置陣，代馬自成行。□□還幽朔，龍輅援晉陽。諸侯爭壁壘，降帥恐翱翔。擬塞蜚狐口，誰增倒馬防？愁言冠蓋子，步履出明光。

天險居庸後，荒城流血深。候臺通戍火，潛峽斷鳴琴。中使馳千輩，□□搆萬金。松杉迴寢廟，戈戟

擁山岑。鳴鏑雖西向，戎車未北侵。神京勞版築，諸將更何心？

烽火頻年見，中原黯不收。征輪滄海盡，盜賊黑山謀。羌部摧河外，安西借隴頭。金牛紛蜀道，宛馬閉涼州。自古秦城險，于今漢將愁。山河多扼腕，歷落對高秋。

郅支西徙日，爭道漠南空。旗鼓轅門偃，筐篚廟算工。但云防□□，誰料直雲中！坐大真難制，橫流更不同。殷憂煩聖主，振落笑羣公。猛士今誰見？還應咏《大風》。

上蒲州韓少師 【考證】《明史·地理志》：「平陽府蒲州，元河中府，洪武二年，改爲州。」又《列傳》：

「韓爌，字象雲，蒲州人。萬曆二十年進士。泰昌元年，拜禮部尚書，兼東閣大學士。光宗疾大漸，受顧命。天啓三年，加少師、太子太師。爌居首輔，爲善類所倚。五年，逆黨李魯生劾爌，削籍除名。崇禎元年，召還朝，復爲首輔。與李標、錢龍錫大治忠賢黨，罪分六等，名曰《欽定逆案》，頒行天下；而吏部尚書王永光，日爲翻案計。二年十月，大清兵入畿甸，永光等倡言，由袁崇煥殺毛文龍所致，以爌崇煥座主也。明年尚寶卿原抱奇、左庶子丁進、工部主事李逢申，相繼劾爌，爌即引疾，詔賜馳驛歸。十七年卒，卒年八十。」

聖曆輝天鑒，宗臣屬斗杓。姓雄周北國，神降晉中條。秉德星明野，鸞暉鶴在霄。生平多大節，爰立事先朝。日月躬彌曜，松筠類可招。比肩趨邴、魏，報主必黃、姚。官府方疑貳，乾坤日動搖。殷憂惟一老，煽處已羣貂。封事推劉向，諸公迫趙嬈。都亭歸印綬，蒲坂傍漁樵。萬里君恩重，三年黨禍消。龍飛驚晦夜，虎變出終朝。華蓋星辰正，祥風律呂調。崆峒還訪帝，大麓共臨堯。道契心應一，時艱治轉遙。已聞和鼎味，曾是奏《簫韶》。公豈耽襲袞？人今想鳳翹。東山初服計，北闕舊名標。河曲烟雲滿，風

陵杖履超。玄言謝傳遠，元壽畢公饒。社稷事多難，忠良德更劬。還應王共載，詎可樂松喬！

【考證】《明史·魏忠賢傳》：「熹宗立，忠賢、客氏並有寵，封客氏奉聖夫人，忠賢自惜薪司遷司禮秉筆太監。及帝大婚，御史畢佐周、劉蘭請遣客氏出外，大學士劉一燝亦言之，帝戀戀不忍舍。既而客氏出，復召入，御史周宗建、侍郎陳邦瞻、御史馬鳴起、給事中侯震陽，先後力諍，俱被詰責。給事中倪思輝、朱欽相、王心一復言之，並謫外，尚未指及忠賢也。及忠賢勢成，其黨謀傾東林，而徐大化、霍維華、孫杰首附忠賢。劉一燝及尚書周嘉謨並爲杰劾去。然是時葉向高、韓爌方輔政，忠賢未克逞。」

吳越武肅王祠

【考證】《杭州府志》：「錢王祠，在湧金門南。舊名表忠觀，祀吳越王錢鏐，鏐子文穆王元瓘，瓘子忠獻王弘佐，忠遜王弘琮，忠懿王弘俶。宋時觀在龍山，蘇軾作碑記。元時燬，明嘉靖三十九年，總督胡宗憲以靈芝寺改建，寺蓋王故苑也。」

羅平妖鳥集，唐室已顛連。草草羣雄事，紛紛割據年。斗牛占王氣，屠販出豪賢。地屈孫、劉勢，形支江海邊。爪牙多健勇，參佐集神仙。本奉中原朔，時分屬國天。錦城開邸第，大木擁旌旂。受冊三樓上，歌風駟馬前。自從納土後，終見舉宗遷。青蓋方朝洛，丹書改賜田。金輿何日去？玉盃不曾還。守墓新恩重，荒祠舊德傳。冕旒皆壯麗，子姓特綿聯。晚樹騰鼯鼠，虛簷響杜鵑。崇功銘板碣，遺恨滿山川。異代還祠廟，當年入管絃。寶融應貴寵，張軌共周旋。錫禮何妨盛？王侯豈易捐！誰言脫屣便？不見誓書堅。宋室諸陵在，南枝更可憐。

《平露堂集》

寄羅湘中少宗伯

【考證】《明史》本傳：「羅喻義，字湘中，益陽人。萬曆四十一年進士。天啓六年，擢

南京國子祭酒。諸生欲爲魏忠賢建祠，喻義懲其倡者，乃已。忠賢黨輯東林籍貫，湖廣二十人，以喻義爲首。莊烈帝嗣位，召拜禮部右侍郎，協理詹事府，尋充日講官，教習庶吉士。喻義性嚴冷，閉戶讀書，不輕接一客。後見中外多故，將吏不習兵，銳意講武事，推演陣圖獻之，帝爲褒納。明年九月，進講《尚書》，講義中頗傷執政。溫體仁不懌，吏部希體仁指，議革職閒住，家居十年卒。」

聖代丹青事，何人負壯圖？長沙星應瑞，朱鳥嶽分符。謝傳風流首，山公機鑒殊。玄文原霸楚，大武欲□□。兵法軒轅祖，田功姬旦謨。上書驚朔漠，講幄贊天衢。絳、灌真相厭，蕭、劉可盡誣。昔曾鋤僞學，今見逐名儒。懷瑾湘江暮，寧蘭淥水孤。春風天入草，寒雨夜啼烏。家國方多難，英賢孰與俱？猿聲通楚峽，雲影凍蒼梧。應有安車至，微聞畫像無？蒼生霖雨急，豈得愛江湖！

中都

【考證】《明史·地理志》：「風陽府，洪武二年九月，建中都，置留守司於此。」

豐、沛承宗祀，神圖奕葉光。櫟陽鐘慶遠，畢陌發祥長。漢太上葬櫟陽，文王葬畢陌。歷數歸龍躍，山川識鳳翔。山名鳳凰，故號鳳陽。寢園騰瑞靄，原廟聳高涼。陵戶趨馳道，祠官拂御牀。配天羣帝饗，鎮地百靈襄。瞻拜三千國，尊崇十五皇。守臣今玩泄，小醜忽猖狂。湯沐恣焚掠，松楸盡翦傷。幸無悲玉碗，已

見墮神房。碧獸燒猶變，金鳧驚不妨。衣冠游慘淡，鐘簾委蒼茫。井邑嚴霜白，山林宿霧黃。聖人哀震怒，故老泣彷徨。痛恨誰當國，陰謀竟輟防。先是撫臣請移鎮，朝議不許。使臣恭慰重，將作聚工良。帝力成何易，王心迴弗忘。仲華祠祖廟，傅亮表崇揚。未至天衢翳，重瞻王氣昌。樊崇惡不赦，熊遠計仍藏。勸元帝出師修五陵。北極朝廷盛，東方寇盜亡。已聞奔漢沔，何策遁雍梁？高帝威神大，今皇孝德彰。但思民賜脯，應見舜垂裳。元凱登三事，共驩出四荒。塗山弓劍地，千載頌苞桑。

【考證】《通鑑綱目三編》：「崇禎八年正月，賊陷鳳陽，留守朱國相等戰死。先是，南京兵部尚書呂維祺懼賊南下，請防護鳳陽陵寢，不報。賊至，焚皇陵，殺軍民數萬，漕運都御史楊一鵬在淮安，遠不及救。帝聞變素服避殿，遽一鵬下獄，棄市。」《經寇紀略》：「初，聞潁州失事，即虞創陵寢。亡何，河道總督劉榮嗣有急奏，後三日，一鵬振纓之疏始至。遣官告天地社稷，哭于二祖列宗之廟。命駙馬都尉王昺、太康伯張國紀，行祭慰禮。用兵部侍郎朱大典爲淮撫，命故總兵楊御蕃馳赴廬，鳳修復陵園。」

【附錄】李雯和臥子詩：「鳳歷真人受，龍興淮甸清。鍾離實舊域，豐沛作中京。地首風雲會，山懸日月名。丹陵推火德，渦水發菁精。白馬諸軍插，黃旗四海迎。《大風》曾會舞，壽域寄斯城。國以淵源重，神扶列聖明。山河塵不動，玉帛薦逾誠。翠柏朱甍暗，含桃玉盃晶。星辰依劍佩，嶽瀆衛精英。蘭盾恒嚴柝，勾陳屢踐更。千秋甘露下，水夜紫雲晙。乞活流枉矢，中原逸駭鯨。火飛帳殿側，戟斷寢門橫。玉砌麒麟臥，銀河鳧雁驚。香寒園令燼，械脫貴囚行。欲使神州靜，多非謀國情。長陵竟抔土，河上但重纒。黃屋悲應慟，赤眉罪已盈。九天聲薄伐，六月寄專征。羣盜仍秦楚，林官自並營。東封何日掃，帝里幸隨平。剪棘玄廬肅，扶輿原廟成。責躬持素服，恭慰卜駢牲。日御占虹氣，階符問月卿。倉庚空自語，狐鼠畫長鳴。往往多羅尚，人人謝顧榮。主憂寧免辱，算少孰持傾？且勿耽槐鼎，無勞弄旆旌。願思哀痛詔，努力爲蒼生。」

晚春遊天平

【考證】《蘇州府志》：「天平山，在支硎南五里。山皆奇石，頂平正，曰望湖臺，即遠公菴遺址；上巨石圓而面湖者，曰照湖鏡。山半有白雲泉，爲吳中第一水。」

自入桃源去，層阿翠不收。珮環空澗響，雲霧曉窗流。紅藥生金屋，青山倚畫樓。鶯啼開玉帳，柳動拂銀鉤。解帶溫泉夜，凝妝石鏡秋。碧潭春濯錦，丹樹雨張油。斜月通蕭史，微風醉莫愁。人繇花上度，客似夢中遊。歌舞何時歇？山川盡日留。橋猶名宛轉，鄉已失溫柔。豈必千年恨？登臨見古丘。

送宋子建應試金陵隨至海州成婚

江臯紅菡萏，青舫去悠悠。枕簟碧雲暮，帆檣銀浦秋。南朝多俊逸，東府最風流。已拂桓伊笛，還登孫楚樓。彥和攀沈令，思晦舉揚州。鳳翽羣千仞，龍文上九旒。宮槐朝影落，巖桂夜香幽。白夢交神女，何心載莫愁？淮烟飛塞雁，楚色淡牽牛。翡翠過滄海，櫻桃滿鬱洲。相傳謝女秀，應伴馬卿遊。上苑啼鶯巧，清淮芳草柔。貽君錦繡段，眎勉覓封侯。

《白雲草》

贈熊壇石大司馬

【考證】《明史》本傳：「熊明遇，字良孺，進賢人。萬曆二十九年進士，知長興縣。四

十三年，擢兵科給事中，旋掌科事。上疏極陳時弊。忤詩教等以明遇與東林通，出爲福建僉事，遷寧夏參議。天啓元年，以尚寶少卿，遷太僕少卿，尋擢南京右僉都御史，提督操江，建營伏虎山，選練蒼頭軍，以資守禦。五年，坐汪文言獄，謫戍貴州；莊烈帝即位，釋還。崇禎元年，起兵部右侍郎；明年，遷南京刑部尚書；四年，召拜兵部尚書。疏陳四司宿弊，悉見採納。五年正月，山東叛將李九成等陷登州，明遇過信巡撫余大成言，力主撫議，久愈猖獗，萊城被圍幾陷。帝責以疎庸愼事，命解任候勘。尋以故官致仕。久之，用薦起南京兵部尚書，改工部，引疾歸，國變後卒。」

筆路開荆域，靈源啓大風。南州時譽重，北斗夜光融。絕俗標清議，橫波見直躬。人驚山嶽氣，名人顧廟空。開府臨江左，英聲到海東。浮雲搖組練，落日靜艨艟。謫籍看鉤黨，清朝錄舊功。正當□牧馬，得計夢非熊。玄扈天符大，丹書睿算通。四夷懷盤綬，九伐賁彤弓。勳業風雲際，鬚眉圖畫中。自辭黃鉞去，還與素門同。禮樂宗孺子，江湖老謝公。功成祠濟北，道在訪崆峒。嗣子金閨彥，傳家玉帳雄。更聞持手詔，安坐策西戎。余同年熊伯甘司馬，公長嗣也。

《湘真閣稿》

傷春 五首

河北烽烟地，江南花柳春。經年愁戰馬，百驛少行人。謀國無楨幹，憂時獨隱淪。蕭條搖白草，熠熠